

Inatsisartut suleriaasissaannut siunnersuut
Siulittaasoqarfimmit saqqummiunneqartoq

pillugu

Suleriaatsimut Ataatsimiititaliap

ILASSUTITUT ISUMALIUTISSIISUTAA

siunnersuutip pingajussaaneerneqarneranut saqqummiunneqartoq

Ataatsimiititaliap suliarinninnermini ilaasortarai:

Inatsisartut siulittaasuat Josef Motzfeldt, IA, siulittaasoq
Inatsisartunut ilaasortaq Per Berthelsen, Siumut
Inatsisartunut ilaasortaq Olga P. Berthelsen, IA
Inatsisartunut ilaasortaq Finn Karlsen, Siumut
Inatsisartunut ilaasortaq Justus Hansen, Demokraatit
Inatsisartunut ilaasortaq Siverth K. Heilmann, Atassut
Inatsisartunut ilaasortaq Knud Fleischer, Kattusseqatigiit Partiiat

Ataatsimiititaliap UKA2010-mi 28. oktober 2010 aappassaaneerinninnerup kingorna siunnersuut misissuataaqqissimavaa.

Ilassutitut isumaliutissiisuteqarnermut tunuliaqutaasoq

Namminersorneq pillugu inatsisissap pilersaarusiorneqarnerani Inatsisartut Naalackersuisullu pillugit inatsisip nutarterneqarnissaa namminersornermik aqqissuussinerup atuutilersinneqarnissaanut utaqqisinneqarsimavoq.

Namminersornerup eqqunneqarneratigut nutarteriniarneq aallarteqqinneqarsimavoq, taamaallilluni ataatsimiinnermi matumani tamanna pillugu siunnersuut oqaluuserisassani imm. 24-tut ilanngunneqarsimalluni.

Inatsisartut Naalackersuisullu pillugit inatsisissatut siunnersuummik suliaqarneq Siulittaasup Naalackersuisoqarfiani Inatsisartullu Allattoqarfiani sulisunit peqataaffigineqarsimavoq, aallaqqaammulli naatsorsuutigineqarsimalluni inatsisissatut siunnersuut suleriaasissamut nutaamut siunnersuummut peqatigitillugu saqqummiunneqassasoq, Inatsisartut Naalackersuisullu pillugit inatsisip nutarterneqarnerata ilaatut aalajangersakkat taamaallaat Inatsisartut nammin-

neq suliasaminnik agguataarinerannut tunngasut peerneqartussaammata, taarsiullugulu Inatsisartut suleriaasiannut ilanngunneqarlutik.

Siunnersuutip imarisaa siunertaalu

Naalakkersuisut suleriaasissatut siunnersuutip aappassaaneerneqarnerata **kingorna** Inatsisartut Naalakkersuisullu pillugit inatsisissatut siunnersuutip aappassaaneerneqarnissaalu **sioqqullugu** inatsisissatut siunnersuummi aalajangersakkamut, inatsisissatut siunnersuummi suleriaasissamullu siunnersuummi assigiimmik ilaasumut, allannguutissatut siunnersuummik saqqummiussaqarput.

Siunnersuutit peqatigiillutik suliarineqarnerisigut siunertarineqartut ilagimmassuk inatsisip suleriaatsillu akornanni siusinnerusukkut oqimaaqatigiinnerup pilerseqqinneqarnissaa, suleriaatsimut ataatsimiititaliaq isumaqarpoq pingaaruteqartoq suleriaatsimut siunnersuutip iluarsineqarnissaa allannguutissatut siunnersuummik saqqummiunneqartumik saqqummiussisoqarnissaa.

Allannguutissatut siunnersuutikkut Naalakkersuisunut ilaasortat Inatsisartunut qinigaanngitsut kalaallisullu oqaaseqanngitsut Inatsisartuni danskisut kalaallisuumngortillugit nutserneqartusamik oqalussinnaanissaat tunngavissinneqarpoq Inatsisartunut ilaasortat qinikkat assigalugit.

Allannguut pisariaqartinneqarpoq Naalakkersuisunut ilaasortat Inatsisartuni oqaaseqarsinnaatitaammata.

Ataatsimiititaliap siunnersuummik suliarinninnera

Ataatsimiititaliap suliarinninnermini aallaavigisimavaa kissaatiginarmat Inatsisartut Naalakkersuisullu pillugit inatsit Inatsisartullu suleriaasiat inaarutaasut sapinngisamik pineqartoq ataaseq pineqartillugu nikingassuteqannginnissaat.

Inatsisartut suleriaasissaat inatsisitut ilusilerlugu akuersissutigineqartussaammata pineqartup ataatsip qanoq paasineqarnissaa aamma inatsisilerinikkut suliarineqarnissaa qanorlu pingaartinneqartiginissaa pillugit nalorngissutinik pilersitsisoqariaannaasinnaavoq. Tamannalu pingitsoortinniarneqarpoq sapinngisamik annertunerpaamik inatsimmi suleriaatsimilu aalajangersakkat assigiimmik oqaasertalerneqartarnerisigut, uteqqiinissat pisariaqarsimatillugit.


Taamaalilluni ataatsimiititaliap suleriaasissamut siunnersuummi § 54-imut allannguutissatut siunnersuut ilalerpaa Inatsisartut Naalakkersuisullu pillugit inatsisissatut siunnersuummi § 9, imm. 2-mut allannguutissatut siunnersuutip assinganik oqaasertalikkamik assinganillu nasuiaatitalimmik.

Allannguutissatut siunnersuut isumaliutissiisummut matumunnga ilanngussatut ilanngunneqarpoq.


Ataatsimiititaliap inassuteqaatai

Ataatsimiititaliap isumaqatigiissup siunnersuutip akuerineqarnissaa inassutigaa.

Ataatsimiititaliap taamatut oqaaseqarluni siunnersuut pingajussaaniigassanngortippaa.



Josef Motzfeldt, Siulittaasoq


Per Berthelsen


Olga P. Berthelsen


Finn Karlsen


Justus Hansen


Siverth K. Heilmann


Knud Fleischer